

Hato'o ba:
Sua Exelénsia,
Dr. José Ramos Horta
Prezidente da República Timor-Leste
Palásiu Prezidensiál Nicolau Lobato
Dili, Timor-Leste

Asuntu: Pareser kona-ba Indultu ba kondenadu Violénsia Seksuál

Sua Exelénsia,

Ho respeitu boot, ami husi Organizasaun Forum Komunikasaun ba Feto Timor-Leste (Fokupers) hamutuk ho Sekretaridu Forum NGO Timor-Leste no Judicial System Monitoring Program (JSMP) apresenta ami nia opiniaun relasiona informasaun sira publika liuhusi média oioin kona-ba lista kondenadu sira ne'ebé sei hetan indultu iha 20 Maiu 2025 iha komemorasaun aniversáriu restaurasaun independénsia Timor-Leste ne'ebé inklui **kondenadu ba krime violénsia séksual** – Sr. Richard Daschbach.

Hanesan Organizasaun Sosiedade Sivil ne'ebé eziste ho nia vizaun hodi garante feto no labarik sira nia direitu atu moris livre husi forma violénsia oioin tantu violénsia fizika, psikolójika, ekonomia sosiál inklui violasaun seksuál, ami reprezenta labarik vítima sira hosi violasaun seksuál hato'o ami nia **preokupasaun sériu kona-ba desizaun Nai Prezidente hodi fó indultu ba kondenadu sira ne'ebé inklui autór krime violénsia seksuál** hasoru labarik sira.

Ami konsiente katak ezersísiu hodi fó indultu ba kondenadu sira iha okazisaun loron boot nasional sira nu'udar kompeténsia própria Nai Presidente tuir Konstitusaun RDTL. Maibé hanesan organizasaun sosiedade sivil ne'ebé durante ne'e dedika an tomak hodi promove direitu feto no labarik sira no asegura protesaun ba feto no labarik sira violénsia bazeia ba jéneru, ami preokupa tebes katak fó indultu ba kondenadu abuzu seksuál ba labarik bele loke fali trauma kle'an ba vítima no sira-nia família. Ida-ne'e mós sei fó mensajen ba públiku katak sistema justisa la afavor ba vítima sira no krime violénsia seksuál no abuzu seksuál ba labarik sira la'os krime sériu, no permite arguidu potensial seluk iha sosiedade atu halo krime hanesan iha futuro.

Haktuir konvensaun nasional no internasional sira ne'ebé Estadu Timor-Leste ratifika no nu'udar estadu-parte, aborda konsiderasaun sira hanesan tuir mai ne'e:

1. **Komité ba Eliminação Diskriminasaun kontra Feto (Komité CEDAW)** recomenda no hola pozisaun klaru kontra indultu ka amnistia ba krime estupu no abuzu seksuál, liu-liu kona-ba feto no labarik feto. Pozisaun ne'e bazeia iha lei internasional direitu umanus no prinsipiu sira ne'ebe iha Konvensaun kona-ba Eliminação Forma Diskriminasaun Hotu-hotu kontra Feto (CEDAW).
2. **La iha Impunidade ba Violénsia Seksual**
Komité CEDAW afirma repetidamente katak Estadu sira tenki garante katak autór violénsia seksuál, inklui estupu ba labarik feto, tenki sai tiha iha tribunál no simu sentensa justu. Fo indultu ba autor sira minimiza justisa no fó espasu ba impunidade, ne'ebe la konsistenti ho obrigasaun husi Konvensaun CEDAW.

3. Obrigasaun Estadu Atu Proteje

Estadu sira ne'ebe partisipa iha Konvensaun CEDAW iha obrigasaun atu proteje feto no labarik feto hosi violénsia, asegura katak vítima sira bele hetan asesu ba justisa, fô medida reparasaun no kompensasaun ba vítima.

4. Justisa Bazeia ba Vítima

Komitê CEDAW defende abordagem justisa ne'ebé konsentra ba vítima, ne'ebe inklui konsidera trauma no danos ne'ebe rezulta hosi violénsia seksual ba vítima, asegura direitu ba vítima atu hetan julgamentu ne'ebé justu no autór simu kastigu apropriadu, evita medida justisa ne'ebé halo revitimizasaun (hanesan fo indultu, ne'ebé frekvente halo vítima sente injustisa fali).

5. Iha Rekomendasaun Jeral númeru 35 (kona-ba violénsia jéneru), Komitê CEDAW deklara klaru katak amnistia no indultu ba krime violénsia seksual la konsistente ho obrigasaun Estadu atu elimina diskriminasaun no prevene violénsia kontra feto no labarik feto.


Nune'e ami husu ba Nai Prezidente atu bele tetu ho fuan no ho prodénsia tuir kompeténsia ne'ebé Na'i Prezidente asume atu dekreta indultu ba kondenadu sira ne'ebé envolve iha **krime violénsia séksuál**, atu fô prioriedade ba justisa no evita vítima sente dezengrasa ka lakon konfiansa ba justisa ba dalarua no atu fô espasu ba vítima no organizasaun sivil atu hetan konsiderasaun iha diskusaun kona-ba perdaun ba kazu sensível sira hanesan ne'e.

Ami deseja katak Sua Exelénsia sei kontinua konsistente ho prinsípiu justisa ba feto no labarik sira vitima violénsia bazeia ba jéneru.

Dili, 15 Maiu 2025

Hodi respeitu,

1. Domingas Afonso Amaral
Diretora Ezekutivu Fokupers



2. Valentim da Costa Pinto
Diretor Ezekutivu Forum NGO Timor-Leste



3. Ana Paula Marcal
Diretora Ezekutivu JSMP



